

T 91171 / 4344 (49)

南園詩選

下冊

南園詩選卷二

晨雨午晴欣然有作

金陵何士顛



晨雨喚夢醒簷漏鳴空階天欲起蟄龍殷殷雷聲借涼
氣入我戶起坐開心懷亂泉當檻出花徑流涓涓庭柯
枯欲死得此回根芟數鳥集其間相呼聲和諧作詩急
贈答何必非吾儕

窓前生意賒草痕迎雨上雨歇作午晴和風爲長養油
油碧影新一覽覺心爽趺坐亦云佳步屣不聞響聊用
掩階荒更借鋪庭敞芟除戒僮僕待蝶時來往

正月廿四日簡齋夫子招同陳脩齋曹澹泉項莘

甫鮑文石隨園看梅花卽席得三絕句

聞約看梅興便清梅花未見鶴先迎阿誰分得孤山福
我輩親隨杖履行

不須陶寫憑絲竹山鳥枝頭亦解歌莫怪迷花人似蝶
入花深處得春多

文酒尊前雅抱開夜深良會敢辭杯寒香也似程門客
爭入春風坐上來

薔薇

弱蔓緣牆上高沾雨露頻枝多傷手刺如拒採花人

除夕客至同登雨花山

白日促歲除餘光戀今夕忽聞剝啄聲欣然來二客

我山中廬相與話閒適把臂繞庭梅苔痕記履跡

人生過中年關心在暮景出門指雨花來送斜陽影地
高天難昏縱日立峰頂炊烟迷萬家餘霞擁前嶺疎鐘
林端來紫翠眾山靜

下山覓微徑徑盡忽又有行吟戀景光相攜怕分手醒
眼餞歲難來酌茆店酒樽前惜黃昏明朝卽歲首歸鳥
喧暮林輕烟上新柳相對各無言徒倚空亭久

雪後山行與幼峰作

窮冬荒野徑一雪便多情頓覺崎嶇失相誇步履輕萬
山羣玉潔大地兩人清覓食憐飢鳥呼羣亦自驚
置身銀海上覽勝不知寒何處塵氛著今朝眼界寬天

西園詩選 卷二
低飛雁近雲凍出山難如此瓊林好無人試一看

江行雜詩

堤柳霜輕綠尚稠邨邊紅樹幾家秋蘆花似我真無賴
潦倒風前盡白頭

燕子磯

危磯屹立與波爭何處飛來以燕名萬古羽毛蒼蘚潤
一生飲啄大江清登臨自有凌霄意覽眺寧無弔古情
閒羨水邊坐漁父垂竿風裊釣絲輕

瓶梅

山梅雪後無全蕊瓶裏香浮小室清一樣花開兩遭際
才知攀折是多情

枕上

好雨不妨睡聲來枕上清燈痕學米小夢境似雲輕往
事靜能記老懷閒更平晨興看春草生意眼邊迎

花前作

花竟憐人老衰顏也映紅吹香滿懷袖解意是春風

過隨園先生齋中見案頭抄錄拙作感賦一首

忽驚兩眼慰衰殘一卷詩抄墨未乾名士有情痴亦嗜
細流無擇海原寬不教覆甕從時棄誰說知音自古難
但得麻沙見新本絕勝身後與人看

先生有爲
余鐫刻意

春游書觸目

春風吹綠溪邊柳掩映天桃恰放時偏是看花空薄暮

南園詩選 卷二 三
斜陽紅透最深枝

蔡芷衫自武昌以詩見寄次韻奉答

益友睽違學術疎空山老我閉門居難禁離思三春柳
忽接他鄉雙鯉魚高會有時來夢境達觀何地不吾廬
遙知觴詠饒清興明月南樓望眼舒

深林求友聽鶯啼把臂難忘步野蹊人遠竟疑天上去
詩留常對壁間題烟霞有癖憐孤賞安樂無窩少定棲
時余有移居意遙向荆襄一翹首濃雲遮斷滄萋萋

早起過山寺聽鶯

野人早起先於鳥穿林路指花宮窈來聽黃鸝第一聲
烟開萬綠山初曉疎鐘不帶白雲撞讓出風前面嚙腔

歌猴一串明珠瀉百舌無言氣盡降枝頭現睨羣音作
處處笙簧奏仙樂花底流泉調玉琴竝化春聲散巖壑
我來傾耳暮春時一曲天然絕妙詩分明寄語騷壇客
如此元音知不知

四月十四日夜天池道士招諸同人集雨花山房
閉門抱微痾默坐結遐想忽來紫府招如鳥出羅網入
門塵事空庭軒愛幽敞疑聞步虛來竹梧奏清響一飲
壺觴傾舉座盡蕭爽不知留客遲但見歸禽往虛白襟
袖生前峰月初上

月上衆妙生變幻弄烟靄造物巧設施水墨爲圖繪山
樹盡浮空點點梢在外共喜置身高縱觀得不昧微風

吹草香露氣上衣帶何處鳴疎鐘餘音散深翠
深翠望無極中有流鶯鳴應爲月所誤深夜認天明下
界墮睡鄉夜氣失其清輪與獨醒客靈境誰相爭不須
秉燭遊暢我行樂情動靜分頃刻東方紅日生

盆中荷放數花欣然得句

看荷盆裏當臨池翠蓋遮檐暑不知花愛院深常靜吐
簾妨香過莫低垂芳根宐潤勤添水陰思俱清合有詩
移榻堦前眠未得露涼風過月明時

鑑上人招同金雉山吳賢佐納涼

簾卷披襟好風清竹裏過山幽似招隱蟬噪當聞歌入
社前緣續觀空悟境多詩中堪送老青髻奈君何

隨園晚歸途中有作

纔坐春風來又迎秋月返今朝多好懷佳境復在晚月
與我周旋清光隨路轉疎林淡墨描倪迂畫意善緩步
虛白中落葉滑且軟前溪斷續明荷枯積水淺孤吟寂
無人隔離吠村犬仰視天宇寬令我心顏展征鴻雲外
聲飄然意俱遠

病後

病後吾衰甚頭顱白雪新自欺猶諱老怕見鏡中人

過雙柏山房贈宏舟上人

冬晴山翠未全凋來過閒房野興饒失稿詩從僧壁見
煮茶烟趁髯絲飄身依臥佛心逾嬾鳥占深林語易嬌

願與遠公同出世自來蓮社那須招

牧牛詞

谿山雨過春艸綠牧童牧牛蹊逕熟艸聲在口尾亂拂
似喜草多堪果腹果腹牛肥力頗強耕犁勝任田不荒
攀角上牛牛低首帖然駝背負童走渡河坐臥作水嬉
烟波自在牛負之戲隨所使勞亦奚辭牛愛汝汝不知
怒則猶將鞭撲施

打麥詞

打麥打麥聲滿村遺麥在田鳥雀喧丁男力健不停手
婦饁麥飯香盈口莫倚天晴力少休雨多正在天晴久
樹頭有鳥喚插禾秧針青青肥且多犢驅犁雨農披

打麥纔畢期打禾莫笑得隴兼望蜀豐年天易從人欲

立冬前九日隨園雅集得羨字

佳招赴名園妙境領難遍未親菊花杯先近芙蓉面先
生風騷主事事皆可羨放舟雙湖中花光霞彩絢霞彩
落清波上下紅萬片水曲棹頻移柳多絲易罨玲瓏隨
處通水雲與日旋如讀先生詩靈奇筆善變園分座上
春秋草綠葱蘢魚鳥來相親忘機與客戀蕩漾意俱仙
風色冷然善

夜咏

霜天庭院靜無譁清夜無眠興更加閒坐預占來日喜
不看明月看燈花

掃墓

原頭秋草冷侵衣
落葉空山作雨飛
底事欲歸歸故緩
一回來日一回稀

野外雜詠

霜後溪塘徹底清
堤邊小立數魚行
漁人應自收綸早
避釣渠今眼最明

十月廿五日鑑上人招同項莘甫蔡小癡鮑文石

方子雲方甫叅奉陪簡齋先生僧舍看菊

幾瓶畫意菊縱橫
世外佳招興更清
瘦影空人如勸酒
淡香浮盞當餐英
全忘冬日山中冷
祇覺春風座上生
我替黃花慶知己
當前相對有淵明

春曉得句

檐外陰雲未肯晴
卷簾風細曉寒輕
高窓樹集野禽語
一夜雨催春草生
負郭已聞農事舉
為儒敢怠硯田耕
好書景物兼懷抱
知己當前是管城

喜晴

層雲看漸薄
天意晚晴真
忽放斜陽影
如逢久別人
園花催信早
林鳥變聲新
預蠟登山屐
來朝試健身

咏隨園梅花並頭蘭卽贈史存之公子

隨園樹樹鳥聲譁
似報春來此最嘉
添得妙香荀令善
薰衣是處有梅花

才調雙清好唱酬
仙雲繚繞鳳凰樓
花神曲意摹佳偶

開到幽蘭也竝頭時公子就婚隨園

題嚴子進江寧石刻記後

觀書貴卓犖好古須搜羅忽近而圖遠遺漏翻恐多子
進佳公子貌雅心謙和有本紹家學如探淵泉波手著
石刻記不出百里遐上下數千載撫卷供吟哦殷勤為
註釋繁樹分枝柯考據証經史字字精研摩妙墨耳目
前往往人空過我欲裹糧往尋訪荒山阿苦無濟勝具
雙髻如斯皤輪君正年富殘碑覓烟蘿他日事壯游遐
搜當如何今忽覩是集如飢得嘉禾又如居井蛙竟作
聽經鶯從茲識夔趨觸類欣摩抄魚魯與豕亥庶辨無
差譌稽古借抄寫吾其慰蹉跎

消夏雜詩

閣外方塘塘外河兩般清濁雨餘波分明纓足隨人濯
閒唱滄浪孺子歌

風颺萍開池水深垂竿人坐綠楊陰羨魚客與觀魚叟
一樣閒身兩樣心

秦淮泛舟

渡口舟喧落日時往來打漿莫教遲潮來不改當時水
花密偏難出色枝入席客多狂杜牧聞歌情觸老桓伊
留連不負風光好白月紅燈綠酒卮

七月三日隨園先生招看雪蘭分賦

喜來幽谷鶴書招書展茆堂慰寂寥兩字雪蘭剛到眼

心香早已俗塵消

看花意外接嬋娟何福能消一笑緣莫謂瓊樓果清冷

蔚藍原是有情天

樓名蔚藍天

淨憐香草絕纖埃滿座清芬雅抱開秋日居然春上巳
美人如爲采蘭來

不用留仙到夕曛怕將文酒醉紅裙素心花與人同淡
轉笑樊川乞紫雲

八月十五夜對月

華月表佳節今宵興倍生秋剛一半好光正十分明寫
意星文淡窺人鏡彩呈雲收如遠避天淨讓孤行不比
平時望應多萬戶迎預占元夕美欣仰碧空晴天地生

虛白鬚眉照潔清攜孫同覽眺移榻近檐楹照樹天疑
曉辭巢鵲有聲花低知露重衣薄愛風輕勸飲杯添酒
分甘弟後兄爲憐天趣得遙指雁橫行凝睇旋興感飢
驅欲遠征時將有中州之行衰年身轉健生計筆堪耕耽賞全
忘臥臨風易解醒秋砧聲未動夜氣暑初平幸免江才
盡狂同謝賦爭吟成誰與和墻角草蟲鳴

雨晴漫書

連朝秋雨送新寒擁褐開書覓古歡飲食人間知味鮮
熊魚眼底得兼難却憐老圃花期近準擬清尊酒量寬
風細緩晴晴意穩不勝幽興倚闌干

圓几

南園詩選 卷二 九
鼎足雖分一几張盍簪偏喜就無方儘容卿輩誰爭席
好對冰輪共舉觴接膝盡成聯璧客象形空置聚星堂
坐來宛轉隨人意物到圓融也見長

煖炕

落木風威正肅霜衰年空煖炕爲床好依火伴消冬夜
不用湯婆共睡鄉窓月孤寒剛照影瓶梅親炙已浮香
夢中添得温存意衾枕歡同老孟光

閒居雜詩

寡營隨處適心期幽興茆堂瓦雀知鏗爾希音誰鼓瑟
固哉高叟自爲詩天寒已釀梅香久境好何嫌蔗味遲
鎮日閉門無客過開書閒覓古歡時

將之鳩江賦此自述

暫辭白社赴鳩茲珍重良朋酒一卮今夕驪歌同把手
明朝山店獨題詩賣文異地成孤客對月他時憶故知
百里家山隔烟水歸舟屈指是瓜期
炎天愁見火雲流無那饑驅又出遊貧怯路難頻卜卦
家憐山好尚登樓琴書伴我如良友心事勞人媿整鷗
此去行踪應檢點懷中刺字肯輕投

采石店曉發

帶夢出茆店月斜猶在天樹濃千點墨山淡一痕烟斷
岸潮聲咽江空曉色先艸香滋露氣時泛笋輿邊

采石謁太白樓

南園詩選 卷二 十一
埜岸辭舟覓路行獨來樓上拜先生一杯天地無餘事
萬古風騷仰正聲圖畫壁殘諸岳暗鬚眉月照大江清
鳳鸞音杳何人續多少啾啾瓦雀鳴

月夜雜興

門掩高齋似水清空階月占一方明隨身恰有消閒法
自咏新詩繞柱行

輕寒消盡臘殘年直擬春宵二月天何處櫓聲雲外曳
被風吹落小窓前

雲淨遙空雁一行卷簾蟾魄暎空梁平時共醉酒人遠
衣上酒痕猶自香

山居夜坐次門人穆堂韻

山居貪夜坐幽意冷雲知雁迥飄音遠燈閒墮蕊遲偶
尋行笥稿細勘近年詩清影憐溪月松間鶴語時

偶成

移席南窓坐爐香暖漸融才于趨世拙詩到近情工拾
字翻殘帖臨風望遠鴻窮冬忘日短閒處有餘功

埜菊

幽翠秋山望不分亭亭野氣淡斜曛絕無人處偏逢我
不寄籬邊却羨君手植何心煩老圃巖棲有意伴閒雲
臨風瘦影何岑寂落葉蕭蕭隔嶺聞

清明後一日同芷衫青谿子雲郊外看桃花

衣香人影往來狂樹下成蹊見麗妝幾日風催紅遍野

多情天亦為花忙

自述

五十今過二清貧興轉長閒因省事得老為課孫忘茶
苦有餘味蘭幽無驟香臨流倚高閣吾道在滄浪

倚閣

倚閣雲開望眼明采禾歡喜聽禽聲長貧人漸無奢想
久雨天原忌驟晴河漲岸偕垂柳縮潮平波漾浴鳧輕
客來又觸饑驅感老馬何堪事遠征時秦學士見過有
薦余粵西之行

團扇曲

雙蝶戲我旁欲撲手還住團扇本無情忍令分飛去
思君不見君團扇畫君貌願隨清風來時時入懷抱

項大莘甫為余作雨景圖時風雨忽至旋復晚晴

作七古一首書于其上

項溶為我畫雨景下筆欲使天無功何期此意天已知
赤日忽斂昏窓櫳母乃彼蒼亦善畫墨潑雲氣藏神龍
欲雨不雨太陰黑經營慘淡空虛中須臾顛風佐猛雨
電光亂掣鞭豐霽驚人耳目顯神力似與畫師爭拙工
不則助汝靈氣走腕下竝示粉本驅凡庸君因得此技
更進筆所到處神威通忽然雲散風雨止依舊放出青
天空炎氛一洗覺清曠晚晴儼與秋光逢請君笑補斜
陽景令我老眼快覩桑榆紅

懷楊蓉裳

南園詩選 卷二 三
結交在風雅相契難相離此事關性天外物焉能移所
以韓孟交雲龍願相隨胡爲同心人各在天一涯去秋
晤隨園道合情怡怡高論不妄出引據皆有基及觀所
著作居然古人遺腹笥貯墳典波瀾瀉文詞如瞻天孫
錦閃閃光陸離如得驪龍珠顆顆驚珍奇早慧戒輕薄
君獨厚重持才高忌孤峭君獨情依依老我伏櫪下形
影難相追惟有明月光彼此能共之思君坐月下誦君
貽我詩

每晤隨園師論詩得妙理述君嗜癖拙作常掛齒謂
余淡逸勝才力全不使世多競豪雄對茲覺粗鄙譬如
兩軍接血戰勢未已身在雲霄中但以冷眼視手把玉

塵揮其下自披靡過譽聞雖慚賞音遇亦喜頻年愛苦
吟一得敢自恃齊門難鼓瑟拂拭待吾子何日良會成
再証風騷旨

晚晴

晚晴天有意侶爲白頭人苔潤寒逾綠花濃秋亦春看
孫寬老境隨分適閒身庭樹斜陽裏歡聞鵲噪頻

隨園看芙蓉分賦

未入名園逸興生鶴聲門外遠相迎小倉山翠濃于染
寫得秋光別樣清
萬朵芙蓉一色開高低臨水映樓臺明霞炫日何嫌晚
嬌艷偏宜返照來

南園詩選 卷二
東籬采采插瓶中枝葉親刪位置工同是秋花開獨好
爲公座上有春風

高會華筵綠滿樽一時桃李集公門歸來驗取師恩重
燈下衣香帶酒痕

冬夜

霜氣侵人布被輕殘燈如米剩微明窓前落葉樹飄韻
檻外跳波魚有聲吟爲遣懷憐夜永臥因無夢覺神清
祇防白髮催人老爭奈隣雞喚日生

月下吟

月光散寒空虛白疑天曉征鴻字一行老眼看了了古
樹影橫窓天然留畫稿野寺霜鐘清入耳塵心杳同賞
豈無人心得如我少妙景咏難成欲托絲桐表天星知
我情暗學琴徽小

閉門

閉門無客少逢迎棐几攤書百感平老境自應珍晚節
傳人原不在科名葯因慣病方難驗詩爲探梅句易清
鳥語漸和春漸轉庭柯窓外最關情

雪中山行

唸情生雪後天侶爲詩人靜亦無凡響寒尤釀好春名
花原本色佳境自清真山徑獨行處悠然畫裏身

除日

祇謀餞歲酒盈壺兼味熊魚願久虛春色已教梅自主

南園詩選 卷二
窮愁應與日俱除關心樂事新詩本過眼浮華舊歷書
骨肉團圓貧亦好麗家風趣在吾廬

喜雨

草枯不知春一雨猛然省地潤土膏融綠含有無影物
但留根荖生機誰能屏年來苦病魔今已脫災眚餘生
命可憑何慮類土梗陽和日有功佳趣當自領料理踏
青鞋吟眺眾山頂

喜金荔屏書至

正念良朋病書來喜不禁字工知意適言婉歎情深行
藥防多步傷神忌苦唵鷗盟應更整高會數相尋

雨後似有晴意雲影往來日光不欲遽出戲成一

絕

風都有意收殘雨雲尚多情戀太陽莫怪人間無易事
一晴天且費商量

遣興

閉門擬學坐禪人境過心平悟夙因入雨嬾晴天似吝
好花遲放樹留春書貪記事頻開卷樂取逢場不負身
老去但期間且健能消兩字是清貧
散盡春寒淑景開眼前隨處揔春臺病非爲害何須藥
拙但能藏卽是才無用浮名愁外淡多情亡友夢中來
勸人作達提壺鳥爭忍花間不舉杯

再呈隨園主人

南園詩選 卷二 三
窓嵌玻璃盡紫霞海棠窓外似開花人間此處春難老
客到皆忘鬢有華

雙湖幽勝輞川同一棹灣環路盡通絕似公詩叅活句
水雲無處不玲瓏

無窮佳境在巖阿楊柳風吹笑語過送與名園助春色
水邊來往麗人多

論詩几席許追攀一曲陽春和總難却被仙禽偷格律
長吟花下調高寒

折柳亭

離恨條條向客飄黯然相對惹魂消春回艸色青連浦
影趁鞭絲綠過橋樹擁暮雲嵐翠淡路鋪飛絮馬嘶
不堪回首分襟地猶見花邊酒幔招

贈周芍園

作史才學識作鑿寧獨否死生固有命亦懸鑿者手三
長一不得用藥失八九兔錄亂登人含冤畢竟有半緣
不讀書自用懶求友半緣盡信書硜硜事墨守卓哉吾
周君善學古人後按脉鑿五內沉思默低首君問病根
源一一能分割昔余抱沉疴染疫苦膚受厥名羊毛疹
氣閉昏卯西羣鑿紛然來罕見輒驚走君獨力任之引
書著某某良方豈難求急呼進左右治法用蕎麥作丸
畧以溲勤摩背與胸內患伏不久果然應手出易如探
囊取無勞扁鵲針竟飲淵明酒余夏病至九月而愈三世始服藥

南園詩選 卷二
家風君不負三折始知鑿身試君豈偶先君亦疾此疾餘生有
今朝心感難緘口報以一篇詩用垂名不朽

新秋

炎歊忽以微綠滋階艸幽始知昨夜雨特爲今朝秋新
涼健病身葛衣輕且柔知時感鳴蛩竚聽聲呶嘍殘暑
還幾日青蠅將焉投預種東籬花招人同唱酬
桐葉流清光枝影斜月上涼颺向晚多虛堂愛幽敞雲
淡天宇高境適心神爽遠樹蟬乍稀暗閣螢獨往念茲
團扇情遽忍別我掌時復一驅蚊悞觸琴絲響

六月菊

秋菊偏開盛暑天天教老屋得秋先嚴霜可傲香原冷
熱境能忘品更賢隱逸淨空荷作侶長生閒愛日如年
北窓對久人初倦又結羲皇一臥緣

哭金荔屏

纔慶餘生忽又傷

君三月病愈夏秋復作而歿

眼前天道總茫茫花

榮玉樹凋何易鳳下丹山去太忙張翰鼓琴心自痛向
平遊岳願難償再圖握手惟憑夢夜夜尋君在睡鄉
花日頻招勸舉卮名園分韻鳥催詩爲憐往事思無盡
却似前生隔未遲瘦影飄空秋月照吟魂歸處亂蛩悲
遺編能讀應無恨玉立孤兒擁總帷

賞析奇疑誼最親朋儕那可喪斯人深藏病作鑿無藥
肆應才多累此身蓮社風多荒好會畫圖月落感前因

去秋君招同莘甫過清涼寺與葛
 葯亭性聞上人雅集莘甫作圖
 處重經定愴神
 從今永抱西州慟游

前月書來意頗殷墨痕猶潤紙含芬勸余作達憐同病
 怪爾先歸似斷雲無復論懷欣聚首不堪垂老嘆離羣
 儘揩泪眼秋齋裏一閱華箋一哭君

雜興

自笑迂疎涉世難寡營難覓此身安花開秋晚人心重
 老羨兒嬉歲月寬夢入林泉憐睡好座無書卷覺形單
 倦遊貪看斜陽景閒數歸鴉獨倚闌

五十三年落拓身長貧祇有髯如銀扶衰杖乞山僧竹
 破寂砧驚葛帔人微病借留堪寡欲閒愁強制轉傷神

焚香頂禮聞思像好繼家風結淨因
莘甫為余畫
 白衣大士像

風雅爭談盛此時詞壇敢恨我生遲性情自向詩中見
 甘苦難教局外知論想物齊師傲吏辯留舌在讓張儀
 棗梨聊把心聲托名姓何求藝苑推
時將刻
 拙稿

雲低屋角氣蕭森雨送新寒上短襟戒酒逢杯心又轉
 懷人聽雁感逾深繁華自笑隨風葉果餌孫分潤筆金
 第一要珍行樂具加餐身健荅光陰

雜詩

栽柳復栽松松緩柳易長非關松無情悞在人遠想

夜窓

夜窓破寂樹號風雨點聲添落葉中同瘦靜憐燈下影

一瓶黃菊一衰翁

秋潭

雨餘秋氣肅寒色入幽潭沉漾綠波定暎花紅影酣望
中深亦淺味處淡還甘落葉點空水暗風生暮嵐

和隨園先生送阿遲上學

七齡上學本家風又送佳兒學舍中各授一經前句在
先生生遲官詩有合定看兩宋異時同身穿花影春逾
授雙雛各一經之句

健耳聽書聲老吏聰料得隨園卽葵巷殿前作賦定摩
空葵巷乃先生幼時讀書處

閒意

濃陰深院葉周遮安頓吟身意靜嘉碧玉交柯禽對語

綠窓風細落桐花

隨園張燈詞四首時八月鄉試後十日

黃昏竹樹靜陰森絕艷文章醞釀深火齊霎時高下遍
智珠想見主人心

秉燭猶嫌燭易殘何如燈火萬千攢人間此處天難夜
一樣光明世界看

烟火高懸百尺竿就中景物幻奇觀燭天光燄秋雲煖
消得瓊樓半夜寒

秋聲絕少樹無風燈影層層一色紅祇恐瞻天驚太史
星辰都聚此山中

病喜小愈

南園詩選 卷二 九
病勢初平氣力微聊尋消遣向書幃吟嫌句澁疑才盡
行倩人扶羨鳥飛心淨了無塵事擾庭閒竝覺野僧稀
閉關且喜空閒見便抵空山老息機

玉溪過草堂問疾

多時曾辟穀仙去事還遲病至衰方覺瘦來衣早知堂
虛嵐翠入簾暗野雲垂坐久偏忘倦深情爲子期

立秋前一日夜聞蟋蟀有感

燈餘綠暈夜窓幽墻角蛩唵聽未休不用先期報秋至
病夫秋已在心頭

秋雨病中題壁

一雨百蟲寂寒先病骨侵雲閒宿簷嬾樹濕受烟深逢

厄無靈藥移情對素琴豆花風裊裊清撲小窓陰

癸巳六月抱病山中至九月始愈屢欲作詩中輟
者凡幾矣忽枕上得長句二首起而錄之

久病纔瘳秋已殘此情閒擬谷中蘭蛩唵檻底知寒蚤
事到心頭制感難思飲意先愁戶小禦風身只怪衣寬
朝來不敢窺青鏡爲怕衰容更改觀

簷前返岫濕雲忙山色墻頭盼夕陽天意欲晴雞宿蚤
林臯如吼葉飛狂蹒跚扶杖孤行怯調攝因貧百計荒
消厄祇今憑佛力翻經紙閣靜焚香

哭熊蔗泉觀察

好客本性成客至便歡喜步履雖倚人揖讓自中禮渾

忘兩目盲直以聽爲視鑒別座上人陽秋寓皮裏去年
九月秋招飲看菊蕊燦如錦屏張盤餐列多旨竟使秋
亦春花香酒滿几分題催詩成才語鬥衆美回思今黯
然高風長已矣

謝公愛絲竹陶寫中年情先生兼善歌歌出一座傾秦
淮水閣開波漲梅雨晴金樽與檀板樂取歡場行但聞
陳郎來百感爲之平竝坐呼度曲聲澁憐嬌鶯值茲秋
光殘風物淒以清眼前小滄桑人去時亦更想公身後
靈定主芙蓉城

憶我初晤公公猶善視履來過小西湖欣然爲倒屣談
笑彼春風氣味挹蘭芷厥後來聘書下榻西齋裏恂恂
貴介來敬執弟子禮媿無時雨滋雅抱素餐恥所幸數
晨夕賓主情妮妮論詩意見投堪以膠漆擬虛心如公
稀不把芻蕘鄙得句共商確一字不輕使嗜痴到野人
常將王孟比鐘期今已亾冰絃向誰理惟期嗣父風徐
卿兩兒子

閉門

檐樹陰濃望不分閉門真覺隔塵氛古香滿几閱圖史
清氣拂窓來水雲心靜每尋貧處樂鳥幽常送好音聞
漸生佳境疎簾外新月如眉映夕曛

秋夜

風閃燈青照鬢皤葉喧涼雨撼庭柯病難捷足同遊少

趣到無人獨領多老鶴態閒心更遠古琴調冷韵偏和
幽懷不為聞蛩感檢點奚囊自放歌

寒夜有感

學道須求九轉丹無成難遣寸衷寬西風夜急雁聲澁
高館月明人影寒敢以微才嗟蹭蹬肯將壯志付邯鄲
殘燈挑盡渾忘臥靜理芸編淚暗彈

至日

陋巷貧居生事微閒如鷗鷺渾忘機帶霜鳥啄枯籐果
學禮兒羞短褐衣作客故人應去遠論文好友亦來稀
可堪令節陽生候疎雨寒風靜掩扉

閒咏

韶華憶昔成虛度習氣從今痛掃除日顧行踪真可笑
五年郊外兩移居

漫興

東風吹草色初齊自在幽禽深樹啼春好那堪連日雨
詩多猶續隔年題夢中話舊朋千里簾外垂綸水一溪
隣圃閒看朝出作荷鋤人過綠楊堤

暮春送古漁之鳩江

樹樹濃陰望不分江頭草色綠粘雲落花時節偏多感
欲送春風又送君

月夜懷古漁

滅燭湘簾卷開書綠字分星疎疑避曉天淨不留雲竹

露垂枝重畦聲隔戶聞遙知羈旅客今夜感離羣

秋夜

雨過蟲吟四壁清竹窓習靜坐深更難成幽夢唯今夜
催換寒衣是此聲足病未瘳妨步履家貧多累羨躬耕
無端舊恨閒愁釋貪看燈花落又生

秋日雜感

累同沾絮悟前因縮地無方嘆此身貧戀烟霞榮辱少
詩傳哀樂性情真古墻過雨看苔色野店論懷憶酒人
滿逕秋聲良不惡愛聽蟲語晚來頻

晚歸

卜廬愛住水邊村碧沼萍開映樹痕人與姮娥如有約

歸時清影恰當門

春陰

鳩聲不斷草鳴蛙屐齒衝泥一徑斜積雨天如人中酒
着烟花似錦籠紗溪添新水魚苗長雲護深松鶴夢賒
遙憶西疇農事舉欲偕野老話桑麻

咏隨園紫玻璃窓

不比書堂護絳紗疎櫺如隔赤城霞光騰山駐金烏影
彩射園多鳳閣花玉鏡翻嫌清少色冰壺真覺淡無華
只疑靜夜傳經處藜火朝來燄尚賒

隨園看荷花

仙子凌波潔含情欲語中最憐顏色好偏向酒人紅盤

大擎珠穩風微寫韻工憑闌看不厭身立錦雲叢

消夏

山齋忘盛暑客靜與鷗同硯滴簷牙雨廊通竹徑風勘
詩如擇友攤飯懶書空不用調冰水生平少熱中
池館得秋早荷風涼到心清飄花韻遠綠漲水痕陰磨
墨盤中露窺魚柳外禽呼童採蓮子細嚼動微吟

夜起

夜起步空廊寂然得靈境詩思淨荷香月光漾魚影萬
木清露中暗風逼衣冷知時感哀蛩靜聽心自警

南園詩選卷二

